



Franco Fresi

Su mastru bandidu



PAPIROS

MARIPOSAS



*A Bãrvara,
muzere mea,
cumpanza
de sa fantasia mea*

Franco Fresi

**Su mastru
bandidu**

Figuras de
Pia Valentinis



PAPIROS

Direzione editoriale
Diegu Corraïne

© Papiros, Nùgoro 1997
tel. 0784-34299 fax 0784-230440

Imprintadu dae Grafiche AZ, S. Martino B.A.

Libru publicadu cun su cuntributu
de sa Rezione Autònoma de sa Sardinna
Assessoradu de s'Istruzione Pùblica, Benes culturales,
Ispetàculu e Isport

*A*nnos e annos a como, in custos montes de sa Gaddura in ue como bi sunt cavas de granitu, b'ariat sos bandidos.

Fint òmines chi aiant fatu calicuna cosa de malu e si fint cuados in sos montes, custringtos a furare pro campare e a ochier pro no esser tentos dae sa zustizia. Fit goi chi si faghiant bandidos.

In cussu tempus est capitada custa istòria bera.



Marieddu fit unu pitzinnu chi tentàat a sa sola sas capras in sos padentes de custos montes. Sas primas bias àiat unu pagu de timòria e unu sero àiat naradu a su babu: «B'at erva meda in su paris a prope de domo; ¿pro ite non zugo sas capras a pascher in cue?».

«Petzi sas berveghe paschent in su paris» àiat respostu su babu. «Sas capras, pro dare late bonu, depent mandigare sas frasca chi naschint in artu, in mesu de su bentu. E dae cara chi sas capras no intrent in su cunzadu de sos bighinos».




Su pitzinnu fit semper dae manzanu a sero in su padente, tentende sas capras suas chi mandigàant fozas moddes de aliderru, chessa, lidone e murtitza.

Cando teniat fritu, alluiat su fogu cun ramos de gheniperu chi bogant unu fumu biancu-biancu e nuscorosu.

Cando proiat, si neh'intràat a sas concheddas de granitu.

Marieddu nche colàat sas dies semper in sa matessi manera.



Ma unu manzanu b'àiàt àpidu una novidade: un'òmine cun sa barva fit essidu dae sa padente. Marièddu fit timende ma no l'àiàt fatu cumprender.

«¿Timende ses?» l'àiàt pregontadu s'òmine.

«Nono» àiat respostu isse.

«Tando nos amus a fagher amigos» àiat naradu s'òmine.

«¿Ite nche faghes in su padente meu?» àiat pregontadu Marièddu.

«¡In ue fia in artis, s'àera fit malesana e tando apo detzìdidu de benner a inoghe ca in logu de monte m'intendo mezus!» àiat respostu s'òmine.

Sa boghe de s'òmine fit durche e bona.



Aiat naradu galu : «¡Beni a cussa conchedda! ¡Luego at a proer!»

«¿Comente faghes a l'ischire?»
aiat pregontadu Marieddu, «Sas nues sunt artas».


«Ei, ma sas fozas sunt firmas e sos puzones istant a sa muda. Intro de pagu si nch'ant a bolare e tando at a proer».

E gai fit capitadu.

Da cussa die s'òmine cun sa barva e su pitzinnu si fint addoviados onzi manzanu e aiant faeddadu de medas cosas.



Un die s'òmine àiat naradu a Marieddu: «Ti cherzo imparare su zogu pro no ismentigare». Cun unu cantu de carvone àiat fatu sinnos curiosos supra de sa roca e su pastoreddu los copiàat. E gai, pro dies e dies, paris àiant pintadu sinnos supra de sas rocas, supra de s'arena de sos riigheddos, supra de sos panes de sas figumorisca. Sena belle si nd'abizare Marieddu àiat imparadu a legher e a iscrìer.



Su pastoreddu fit cuntentu e si fit semper de prus afetzionadu a s'amigu suo. Pro isse, a andare a tentare sas capras in su monte, fit una festa.

Un die àiat contadu a s'amigu suo una noa chi àiat ischidu in famiglia: «Narant chi in custos montes b'at unu bandidu malu. ¿Beru est?»

S'òmine àiat risidu e l'àiat carinadu sos pilos.

«Non ti ponzas in pessamentu. Finas a cando b'apo a esser eo cun tegus, nemos t'at a fagher male perunu».

Marieddu si fit intesu prus seguru.



Un manzanu, s'òmine cun sa barva non fit andadu a agatare su pitzinnu. E gai medas àteras dies. Marieddu l'àiàt chircadu in totu ue. No l'àiàt mutidu, ca pro sa prima bia si fit abizadu chi no ischiat su nùmene suo. S'òmine non bi l'àiàt mai naradu.



Su pitzinnu como fit tristu e sena gana de fagher nudda. Non tentàat prus che in antis sas capras, chi a s'ispissu si nch'intràant a sos cunzados de sos àteros. Mandigàat pagu e dormiat male.

«¿Ite tenes?» l'aiat pregontadu su babu.

«Nudda».

«¿Pro ite non màndigas?».

«Non tenzo fàmene».

«Ma, ¿male t'intendes?».

«Non tenzo nudda».

Marieddu si faghiat semper prus tristu.



Una sero, a ora de chenare, su babu àiat naradu a sa mama:

«Oe manzanu, in Logusantu, ant tentu unu bandidu malu: cussu chi in unu merie àiat mortu sete pessones ca fint essidas a testimoni-zos farsos contra a isse».

Marièddu ascurtàat cun curiosidade e su babu l'àiat naradu: «Cras sos carabinieri nehe l'ant a zugher a sa presone de Tempiu. B'at a aer zente meda chi at a andare a lu bider colende in su caminu. B'amus a andare finas nois».



Marièddu fit gai cuntentu de su chi l'àiànt contadu chi azomài si nche fit ismentigadu de s'amigu suo. ¡In fines podiat bider, finas isse, unu bandidu beru, in persone!

Oru-oru de su caminu, b'àiànt zente meda chi isetàat su bandidu. Marièddu non bidiat s'ora de l'addoviare e chircàat de si lu pessare: feu, nieddu, cun sos ogros malos.

In cussu mamentu, sa zente àiat naradu: «¡Millu!».



Marieddu fit brincadu a mesu de su caminu e àiat bidu su bandidu chi s'acurtziàat. Fit supra de unu caddu biancu, cun sas manos presas, in mesu de duos carabinieri. ¡Fit isse, s'amigu suo!

Marieddu àiat aboghinadu: «¡No est unu bandidu!» e si fit acantzadu a sas istafas de su caddu. Pustis neh'àiat collidu unas cantas pedras dae terra e las àiat iscutas a sos carabinieri. E deretu li fit bènnidu unu mancamentu.

Su bandidu no àiat naradu nudda: bortàat sa conca in s'interi chi su caddu andàat a dae in antis, e abaidàat a firmu, cun sas càvanos sinzados dae sas làgrimas, cussu minoreddu, s'amigu suo.

Marieddu non si nche fit ismen-
tigadu mai de cussu òmine.

Aiat sighidu a sa sola a istudiare
e, fatu mannu, aiat imparadu a le-
gher e a iscrier a totus sos chi che-
riant imparare, sena leare mai
unu francu.

Fit unu de sos primos, in cussos
chirros de Sardinna, a ischire a le-
gher e a iscrier.

Totus lu mutiant e lu mutint
galu "lu littaratu", chi in sardu
gadduresu bolet narrer òmine chi
est capassu de legher e de iscrier
una litera.

Marieddu como est betzu e est
zaju. Sos nepodes sunt iscolanos
in un'iscola minoredda de Gad-
dura.